

qual, *contra formam induciarum*, havea fato molte corarie et inferiti dami *in ditione hungaricha*; e havea presentà al re do peze di tabi et una dorada secondo el paexe per ducati 50 *vel* zircha; et per el vayvoda sopra scritto, per el qual stado el signor turchio voria, che 'l re non se impedissa. *Item*, domino Petro Perislo, vien orator a la Signoria, si aspeta, per andar poi a Sibinicho, per adaptar la causa di damni inferili za più tempo *etc.*

*Di Roma, di 14.* Che il signor Constantin Arniti se aspectava de li per conferir con il papa; e le zente pontificie andavano a li alozamenti in teritorio perusino, contra la voluntà di quel popolo, quale dice esser contra i lthoro capitoli. El papa era pur ad Hostia; domino Antonio *de Montibus*, episcopo di Castello, che era designato verso Perosa, se havea excusato, et zerehava che ditto cargo et impresa fosse data al signor Constantin Arniti. *Item*, è nova de li di la morte dil ducha di Savoia; et el signor di Camerino havia scripto al papa, che nel teritorio suo era stà retenuto el cardinal Cosenza, non in habito de cardinal, per li soi subditi, el qual era incognito, con do cavali, et aspectava hordine dal papa *quid agendum*. Dicto cardinal, se dice, non era amico di dicto signor, per tanto era stà usà simel termini verso di quello. *Item*, l'orator nostro judicha, che a la expeditione di Perosa se manderia per el papa domino Alvixe Becheto, fo familiar dil signor Ruberto di San Severino; et cardinal retenuto non si sa dove el volesse andar, nè per qual causa.

*Item*, per una nave, venuta di Sicilia, se intese, le galie di Fiandra vien, capetanio sier Hironimo da cha' da Pexaro, haveano hauto gran fortuna al passar da Palermo a Messina, per la qual haveano perso velle e antene e robe de le coperte.

È da saper, le altre galie di Fiandra, capetanio sier Marco Antonio Contarini, partite di qui in questi di, et va al suo viazo.

*A di 28.* Fo conseio di X con zonta. Et fo letere di Damasco, con avisi di Sophi, la copia di la qual sarà qui soto scritta.

*A di 29.* Da poi disnar fo pregadi. Fato 3 savij di terra ferma: sier Zorzi Emo, sier Alvise Malipiero, sier Batista Morexini, stati altre fiata. Cazete con titolo sier Hironimo Querini, sier Marco Dandolo, dotor, cavalier, sier Marco Zorzi, sier Vincevera Dandolo, sier Zorzi Pixani, dotor et cavalier, sier Francesco Zustignan, sier Francesco Foscari, et sier Alvixe Arimondo, con titolo di cao di X.

Et in questo pregadi fu preso, di disarmar 8 galie, tra le qual le veronese, et altre, *ut in parte.*

*Item*, posto, per li savij ai ordeni, dar certa castelanaria, su l'isola di Candia, per anni 5, a uno nepote dil vescovo grecho di Modon, che fo morto da' turchi, con la  $\dagger$  in man; è presa. La qual parte Jo, hessendo a l'oficio di ordeni, la fici notar.

Fu posto, per li savij, far le spexe a l'orator hongaricho vien in questa terra, et preparato a San Zorzi, e dato barche; è presa. Noto, *solum* il re di Hongaria fa le spexe a li oratori e secretarij nostri.

*A di 30.* Fu ballotà la zonta. Eramo numero 816; et rimase, nuovo, sier Alvixe Mozenigo, el cavalier, fo ambassador al re di romani.

*Copia di una letera, scritta per sier Bortolo Contarini, consolo a Damasco, di 8 zugno 1504, ricevuta 27 septembrio.*

Come, per le altre, mandò a la Signoria le letere dil soldan, di l'acordo fatto, e fò licentià le specie venisse a Damasco. Avisa, il viazo esser poverissimo, per le charavelle di Portogal, che tien sospeso ogni cossa; voria se li mandasse, da li provedadori sora il cotimo, ducati XXV milia. *Item*, el soldan a le cosse di Coloqut nulla provision fa, salvo parole; le signorie pocho cura; il soldan è stabilito, ma non ha persone li sia da cuor a presso. Poi esso consolo scrive cussi:

Se io non ho scripto a li passati zorni, a la sublimità et signoria vostra, cussi diffusamente zereha questo Soffi, questo, è certo, è advenuto *solum*, principe serenissimo, perchè la natura mia è de non seriver cossa, che non habbi fondamento aparente, parendomi le cosse se divulgavano esser troppo grande. Al presente mo, ch'io mi trovo assai ben informato, p r persone che cotidianamente zonne da quelle parte, intendo, questo signor Suffi mirabilmente prosperar, et in fin horra esser signor quasi di tutto el paese signorizava Uson Cassam. El se aspetta a la volta de Bagadedi, et alcuni luogi circostanti, in el qual loco se atrova el fiol de Uson Cassan, tante volte da lui fugato e roto. Son certo, che zonto, obtegrerà ogni cossa et haverà el paese quieto, dico tutto questo, che signorizava el ditto Uson Cassam. *Publice* se divulga, serenissimo principe, che 'l pretende de vegnir in Aleppo et qui in Damasco; et cegna di voler far gran cosse. L'è inimicissimo dil turchio, si per esser de contraria secta, quanto *etiam*, perchè esso signor turchio ha facto et exequido gran crudeltà verso i suffi erano nel suo paese; sì che l'animo suo è pessimo verso esso signor turchio. Et per dir a la serenità vostra ogni